

Bahandi sa Pagpamatuod

Ni Leonardo Rodrigues

Gibase sa usa ka tinuod nga istorya

“Ug karon ako nasayud sa akong kaugalingon . . . kay ang Ginoong Dios mihimo kanila nga makita ngari kanako pinaagi sa iyang Balaang Espiritu” (Alma 5:46).

Si Sabrina nagtan-aw samtang si Mama misulod sa pultahan uban sa ilang mga silingan. “Salamat niini nga basahon,” miingon ang amahan. Naggunit siya og Basahon ni Mormon.

“Ma, nganong makig-istorya man ka sa tanan bahin sa Simbahan?” Si Sabrina nangutana sa wala madugay samtang dungan silang nanghugas og plato.

“Kini tungod kay ang akong pagpamatuod sa Simbahan sama sa usa ka bahandi,” miingon si Mama. “Nakapalipay kini nako. Ug gusto kong mopakigbahin niini sa uban aron sila magmalipayon usab!”

Nahunahunaan ni Sabrina ang sinaw nga kwentas ni Mama diha sa kahon sa iyang alahas. “Unsay buot nimong ipasabut nga kini sama sa usa ka bahandi?”

“Ang pagpamatuod bililhon kayayo,” miingon si Mama. “Kini usa ka gasa gikan sa Langitnong Amahan nga makatabang kanato nga masayud kon unsay tinuod.”

“Giunsa man nimo pag-angkon niini?” Gusto ni Sabrina nga masayud.

Si Mama mitunol kang Sabrina og plato nga nagkidlap-kidlap sa kalimpyo aron paugahon. “Ako kining naangkon sa hinay-hinay. Kon magampo o magbasa ko sa mga kasulatan, bation nako ang kamalinawon ug kainit sa sulod. Sama kini nga nagdugang ko sa akong bahandi sa pagpamatuod.”

Unsa nga matang sa bahandi ang motubo kon imo kining ipakigbahin?



MGA PAGHULAGWAY PINAAGI NI ANDREW BOSLEY

Si Sabrina hinay nga miyango. Mahimo ba siya nga makaangkon og bahandi sa pagpamatuod?

Pagka-Dominggo, ang magtutudlo ni Sabrina sa Primary misaysay og istorya mahitungod ni Jesukristo. Si Sabrina naminaw og maayo. Si Sister Lopez miingon nga si Jesus midapit sa tanan nga gagmayng mga bata sa pagduol ngadto Kaniya. Siya mipanalangin ug mitudlo kanila. Sa dihang si Sabrina naghunahuna mahitungod ni Jesus, siya misugod sa pagbati og kainit sa iyang kasingkasing.

Si Sabrina nagdali nga nangita ni Mama human sa Primary. “Ma, tag-ana kon unsa?” Gisultihan niya si Mama kabahin sa mainiton nga pagbati.

“Ninduta gud ana,” si Mama miingon. “Moabut kana nga pagbati kon ang Espiritu Santo motandog sa atong mga kasingkasing ug mopahibalo kanato nga ang ebanghelyo tinuod.”

Si Sabrina mipahiyom kang Mama. “Mao kana ang nahitabo! Nakapalipay kini nako sa sulod.” Ang Espiritu Santo hilum kaayo nga si Sabrina nasayud nga dili unta siya makabantay Kaniya kon siya walay balaang pagtahud.

Gigakos siya pag-ayo ni Mama. “Karon naangkon na nimo ang imong kaugalingong bahandi sa pagpamatuod.” Si Sabrina mibawos og gakos ni Mama. Siya gusto nga mopakigbahin sa iyang bahandi ngadto sa tanan—sama sa gibuhit ni Mama! Pero unsaon man niya sa pagbuhit niana?

Nianang gabhiona nakakita si Sabrina og pass-along card nga dunay hulagway ni Jesus diha sa

atubangan. Iyang kining gibutang sa iyang backpack.

Pagkasunod adlaw sa dihang panahon na alang sa recess, nahinumdom si Sabrina sa kard. Iya kining gikuha ug nangita sa iyang amiga nga si Carla. “Ania, Carla, para kini nimo,” si Sabrina miingon.

Gigunitan og maayo ni Carla ang kard. “Salamat! Ganahan ko og mga hulagway ni Jesus.”

Gipakita ni Sabrina si Carla sa website diha sa luyo. “Makakat-on ka og dugang mahitungod sa Simbahan ni Jesus dinhi.”

“Unsa kana nga simbahan?” Si Carla nangutana.

“Ang Simbahan ni Jesukristo sa mga Santos sa Ulahing Mga Adlaw,” si Sabrina miingon. “Ang pag-adto sa simbahan ug pagkat-on mahitungod ni Jesus makapalipay nako.”



“Karon ang panahon ug karon mao ang adlaw sa pagkat-on . . . sa kaugalingon nga tinuod ang ebanghelyo.”

Elder Craig C. Christensen sa Kapangulohan sa Seventy, “Ako Nasayud Niini nga mga Butang sa akong Kaugalingon,” *Liahona*, Nob. 2014, 52.



Gibutang ni Carla ang kard sa iyang bulsa. “Akong ipakita kini nga kard ngadto sa akong mama.”

Pipila ka semana ang milabay, midagan si Carla ngadto ni Sabrina sa wala pa ang klase. “Duna koy isulti nimo!” siya miingon. Mipahiyum siya og maayo.

Si Sabrina naghinam-hinam. Unsa kaha kini? Si Carla mipahiyom. “Ang akong pamilya miadto sa inyong simbahan! Ug sama kini sa imong giingon—nalipay ko didto.”

“Nahibalo ko nga mobati ka sa Espiritu Santo!” Si Sabrina miingon.

“Ug sa akong hunahuna sa dili madugay magpabunyag mi!”

Si Sabrina mibarug ug migakos ni Carla. Karon mahimo na silang mopakigbahin og dungan sa ilang mga bahandi sa pagpamatuod! ■

Ang tagsulat nagpuyo sa Amazonas, Brazil.